

La Pro Svizra Rumantscha fa ulteriura proposta

La restructuraziun da la Lia Rumantscha 2016 frunta sin opposiziun tar la Pro Svizra Rumantscha (PSR)

■ Per la radunanza da delegadas e delegads 2016 propona la suprastanza da la Lia Rumantscha (LR) d'iniciar ina restructuraziun da ses organs, quai suenter ina debatta nunmotivada a la dieta «LR19». Quella ha procurà plitost per dumondas avertas che per responsas sin puncts da discussiun sco la legitimat da la LR u la represchentaziun ch'è necessaria per ils Rumantschs. Cun questa proposta n'è la Pro Svizra Rumantscha (PSR) betg cuntesta. Per l'ina ha quai da far cun l'intenzion sezza, per l'autra n'è la PSR betg segira sche quai è il dretg mument per instradar ina tala discussiun.

Il fauss mument

Per il mument n'èsi betg cler tge strategia che la LR persequitescha e tgeninas ch'en las respostas da la LR sin sfidas ch'en actualmain in privel per il rumantsch (vesair sut). L'activitat centrala per la LR duess esser da prender mesuras ch'il rumantsch dovrà per subsister e formular ina strategia per il proxims onns che sa fatschenta cun questas sfidas. Ina restructuraziun senza avair ina mira u visiun è be ina mesira cosmetica ch'è per il mument da pitschna prioritad. Per consequenza duess la LR sa fatschentiar l'emprim cun la strategia per il proxims onns e ponderar pir lura tge strutura che serva il meglier a questas finamias.

Plinavant vegn la lavur da la LR per il rumantsch analisada cun gronda probabilitad en in'evaluaziun externa durant ils onns 2017 e 2018, medem sco la lavur da la Pro Grigioni Italiano e l'Agentura da novitàs rumantscha (quai è tranter auter ina consequenza dal postulat Semadeni). I fiss pli raschunaivel da spetgar sin ils resultats da questa evaluaziun, per il cas che quella maina novas propostas ed ideas era per la strutura. I na fa betg grond senn da restructurar uss ed en dus fin trais onns pu-spè.

La finala ha il rumantsch davaira auters problems che restructuraziuns internas. La suandanta glista mussa mo insaquantas da las pli impurtantas sfidas:

– Territoris da tschep: pressiun sin il rumantsch tras depopulaziun e plurilinguitad (fusiuns da vischnancas).

– Scolaziun e furmaziun rumantscha: mancanza da scolasts, centralisaziun da scolas pervi da la digren d'uffants, iniziativa da linguas, professura rumantscha. Blers Rumantschs han mo fin en la 6avla classa ina buna scolaziun rumantscha, suenter vegn instrùi surtut per tudestg. Bunas cumpetenças da scriver en rumantsch han mo pli paucs.

– Diaspora: passa in terz dals Rumantschs viva en la diaspora senza purschida en lur lingua e senza vusch (rumantsch va a perder suenter duas generaziuns).



– Administraziun chantunala e communal: per part era vischnancas rumantschas che funcziunan surtut per tudestg.

Per la PSR èsi cler che la LR ha il pensum da ponderar cun tge mesuras ch'il rumantsch po propi vegnir sostegni en vista a questas sfidas. Sche la radunanza da delegadas e delegads (RD) da la LR decida d'iniciar ina restructuraziun, alura èn soluziuns per las sfidas numnadas sura d'impurtanza centrala. Ina cumissiun da restructuraziun sto definir las mesuras fundamentalas da la LR per il proxims onns avant che planisar tgeninas ch'en las strutures adattadas da la LR.

In'intenzion da discordia

Las ideas da restructuraziun preschentadas da la LR n'èn betg adequatas per promover la collauraziun ed il sentiment d'unidad. La terza proposta va uschè lunsch da stritgar la participaziun d'organisaziuns tematicas sco la Giuventetgna Rumantscha (GiuRu), la Societat Retorumantscha (SRR), l'Agentura da novitàs rumantscha (anr) u l'Uñiu per la Litteratura Rumantscha (ULR). Sch'ina restructuraziun fiss necessaria duess quella avair sco finamira l'integrazion da personas ed organisaziuns che s'engaschan per il rumantsch. Ma cun questa proposta pari che l'intenzion da la suprastanza da la LR saja da disqualifgar la moda e maniera co che tscherts persunas s'engaschan per lur lingua u dad alman definir che tscherts engaschis sajan pli valurus. Uschia prevesan tut las trais propostas da stritgar la participaziun da l'anr e da la Gruppa rumantscha dal cussegli grond (GrCg), era sche l'anr sa stenta mintga di d'offrir texts en tut ils idioms ed en rumantsch grischun ed era sche la GrCg fiss ina pussaivladad d'avair ina colliaziun directa en il parlament che decida la finala.

da vart da mesuras da promozion e protezion dal rumantsch. En pli para la distinciun tranter l'anr (stritgar) e la SRG.R (mantegnair) dad esser arbitaria, cunquai che omaduas organisaziuns sa fatschentan cun la purschida da medias rumantschas. L'entira proposta da la suprastanza da la LR para dad esser ina decisio prendida plitost a la svelta, che sa focussescha be sin la radunanza da delegadas e delegads, era sche la LR ha anc auters gremis ch'ins pudess responder en il rom d'ina restructuraziun.

Ina proposta da la PSR

Perquai preschenta la PSR ina quarta proposta. Tgeninas èn las lingias grassas che duain definir la structura ord vista actuala? Tenor la PSR èn tschintg puncts impurants:

– La LR sto avair las capacitads e las vusches che s'engaschan per dar frunt a las sfidas menziunadas. Perquai duai la suprastanza vegnir engrondida da tschintg sin set sezs, da quels èn quatter sezs liads a la represchentaziun da la Surselva, il Grischun central, l'Engiadina e la diaspora, e traus libers (incl. presidi). Ina suprastanza pli gronda promova la debatta interna e procura per la pussaivladad dad esser pli activa vers anora.

– La LR duai inizar ina cumissiun che supprenda la rolla da surveglianza da leschas per la protezioni rumantscha. La RD duai eleger ina cumissiun che n'ha betg ina rolla politica, mabain ina rolla d'observaziun en connex cun leschas che duain proteger il rumantsch. Uschia vegn il pensum d'observaziun e d'acziun reparti tranter la suprastanza ed ina cumissiun tematica.

– La RD duai vegnir redimensiunada e surpigliar dapli responsabladad strategica envers la suprastanza. Da nov sa cumpona la RD da 36 delegadas e delegads. Quels sa

scuntran duas fin quatter giadas l'onn per evaluar la situaziun actuala dal rumantsch, chattar cumpromiss, definir posiziuns communablas ed instradar mesuras e projects a la suprastanza da la LR. Las uniuns èn libras co ch'ellas nomineschan lur delegads.

– Las uniuns affiliadas duain vinavant esser part da la RD, però cun pli pauc pussanza. Da limitar la represchentaziun dals delegads sin las regiuns tradiziunalas e da stritgar organisaziuns tematicas che procuran en lur rom per ina lingua viventa e documentada (litteratura, dicziunari, medias, giuventetgna unida sur ils cunfini da las regiuns) definescha da princip che questa moda da s'engaschar per il rumantsch è main valitada che in'autra. Perquai duai la nova formula da la RD resguardar vinavant l'engaschament da las organisaziuns tematicas, ma reducir lur paisa.

– La RD duai resguardar la realitat che passa in terz dals Rumantschs n'abitescha betg pli en il territori da tschep cun dar ina vusch a las personas pertutgadas. Be focusar sin il territori tradiziunal n'è nagut auuter che ignorar la realitat ch'il rumantsch è ozendi ina lingua che vegn era vivida en

Delegaziun

	nov	actual
Surselva Romontscha	8 22.2%	15 23%
Uniun dals Grischs	6 16.6%	10 15.4%
Uniun Rumantsch Grischun Central	4 11.1%	8 12.3%
Diaspora (URB, QL, GR berg rum.)	9 25.0%	6 9.2%
GiuRu	4 11.1%	4 6.2%
SRG.R	1 2.7%	4 6.2%
ANR	1 2.7%	4 3.1%
SRR	1 2.7%	4 6.2%
ULR	1 2.7%	4 6.2%
GrCg	1 2.7%	8 12.3%
Total	36	65

la diaspora grischuna e svizra, e ch'ils cunfini tranter las regiuns n'èn betg in element dominant en la vita dals Rumantschs.

Il dumber da delegads previs da la PSR è sco suonda: las quatter organisaziuns territorialas (Surselva, Grischun central, Engiadina e diaspora) duain surpigner ina rolla centrala en la RD. Tenor la dumbraziun da structura 2012–2014 n'è almain in terz da las personas che discurran rumantsch sco lingua principala betg en il territori tradiziunal. Uschia duai la diaspora avair in terz da las vusches territorialas tradiziunalas. Las organisaziuns tematicas èn vinavant part da la RD. La proposta preesa che la GiuRu sco organisaziun surregiunala da la giuventetgna ed uschia dal futur dal rumantsch duai esser cleramain francada. Las organisaziuns tematicas da lingua e medias èn preschentas cun ina vusch, uschia ch'ellas èn integradas en il pli impurtant gremi rumantsch.

Questa repartiziun da delegads è uschia intuitiva, ma corrispunda a la realitat ed èr als giavischs formulads a la dieta «LR19»: las organisaziuns territorialas tradiziunalas han la maioritad da las vusches a la RD, ma la diaspora vegn integrada sco quart territori, uschia che las vusches territorialas èn tar 3/4 da tut las vusches a la RD. Las organisaziuns tematicas èn vinavant integradas, ma la paisa vegn messa sin la GiuRu sco futur dal rumantsch. Questas organisaziuns n'èn betg dominantas cun 1/4 da las vusches.

Da reponderar è la rolla da la GrCg – sco instrument da lobbying e rait da contacts en il cussegli grond fissi relevant dad er integrar la represchentaziun politica en la RD. Simplamain stritgar la GrCg fissi da mai in sbagli strategic. Avant che decider davart quest punct fissi da contactar questa gruppaziun per chattar ina schliaziun co ch'in contact cun ils deputads è pussaiavel sco part da la RD. En la proposta da la PSR è perquai era la GrCg reintegrada cun ina vusch da delegà sumegliant a las organisaziuns tematicas.

*La suprastanza da la Pro Svizra Rumantscha:
Flurin Bundi, Annetta Zini, Barbla Etter,
Jon Bischoff, Flurin Bundi, Clau Dermont
e Martin Cantieni*